

В ЧЕТВЕРТОК СЫРНЫЙ, ВЕЧЕРА:

От начала поклоны начинаем: и прочая вся служба, якоже и выше во вторник сырный указася.

На Господи возвах, стихиры яко обычно.

Слава, и ныне, Богородичен: Свете тихий: И прокимен дне.

На стиховне самогласен дне, глас 2:

Господень Крест, неуклонно кланяющимся ему, * всякия сласти брозда есть, * и закон воздержания: * ибо непрестанно взирающие на Пригвожденного на нем, * распинают плоть со страстьми и похотьми. * От нихже и мы быти потщимся, * постом чистым присвоимся, * человеколюбно нам присвоившемуся * страстию и Своего безстрастия естество подавшему, * имущему велию милость.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своя: * тако очи наши ко Господу Богу нашему, дондеже ущедрит ны.

Господень Крест, неуклонно кланяющимся ему, * всякия сласти брозда есть, * и закон воздержания: * ибо непрестанно взирающие на Пригвожденного на нем, * распинают плоть со страстьми и похотьми. * От нихже и мы быти потщимся, * постом чистым присвоимся, * человеколюбно нам присвоившемуся * страстию и Своего безстрастия естество подавшему, * имущему велию милость.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

И мученичен: Земнаго наслаждения * не возвелевше страстоносцы, * небесных благих сподобишася, * и ангелом сожители быша: * Господи, молитвами их помилуй и спаси нас.

Слава, и ныне, Крестобогородичен.

Подобен: Егда от Древа:

Грозд всезрелый Чистая, * Егоже невозделанно во утробе младоносила еси, * на Древе яко узрела еси * Сего висяща, * рыдаючи восклицала еси, * и зывала еси: * Чадо, сладость искапай, * еюже пьянство всякое страстей отъемлетя Благодетелю, * Мене ради Тя рождшия, * Божественными утешеньми, яко благоутробен.

Ныне отпускаеши: По Трисвятом,

Богородице дево радуйся: И творим поклон един.

Слава:

Крестителю Христов, * всех нас помяни, * да избавимся от беззаконий наших: * тебе бо дадеся благодать * молиться за ны.: И творим поклон един.

И ныне:

Молите за ны святии Апостоли, * святии вси, * да избавимся от бед и скорбей: * вас бо теплыя предстатели * ко Спасу стяжахом. И творим поклон един.

Таже: Под Твое благоутробие прибегаем Богородице, * моления наша не презри во обстоянии: * но от бед избави ны, * Едина Чистая, * Едина Благословенная. **Без поклона.**

Господи помилуй, 40 кротким и тихим гласом.

Слава, и ныне: Честнейшую херувим:

Именем господним благослови отче.

Священник: Сый благословен христос бог наш всегда, ныне и присно и во веки веков.

Мы же: Аминь.

И молитву: Небесный Царю, * веру утверди, * языки укроти, * мир умири, * святыи храм сей добре сохрани, * прежде отшедшии отцы и братию нашу * в селениих праведных учини, * и нас в покаянии и исповедании приими, * яко Благий и Человеколюбец.

**И творим три поклоны великия, и глаголем молитву
преподонаго ефрема сирина:**

Господи и владыко живота моего, дух праздности уныния, любоначала, и празднословия не даждь ми.

Дух же целомудрия, смиренномудрия, терпения, и любви, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

Малые Поклоны: 12.

Паки скончавше поклоны, глаголем молитву вышеписанную Господи и Владыко живота моего: и поклон един великий.

Трисвятое. По Отче наш: Господи помилуй, 12.

Слава, и ныне: Господи помилуй, [трижды].

Благослови: И отпуст.

Повечерие поем великое с поклоны, якоже во вторник указася.

В ПЯТОК СЫРНЫЙ НА УТРЕНИ,

По шестопсалмию поем Аллилуиа, на глас Троицна гласа.

По 1-м стихословии седальны крестныя Осмогласника.

По 2-м стихословии седален Троици, глас 7.

Подобен: Яко имущи:

Возвыси Церквей рог, честный Кресте, * низложи еретическую гордыню силою твоею, * и возвесели православных лики: * сподоби предварити всем нам * твое предвозвешение, * и поклонитися тебе подножию Христову * в тебе бо хвалимся, * Древо благословенное.

Слава: тойже.

И ныне, Крестобогородичен:

Яко имущи милостивное на смирение наше, * и зрящи на земныя удобообстоимыя люди, * умилосердися благословенная Богородице, * пребуди молящися, * да не погибнем люте: молю яко Пречистая * благопримирительнаго Бога, * спаситися душам нашим, Пресвятая Дево.

Таже чтем слово Великаго Василиа о посте, егоже начало: **Вострубите** в новомесячии трубою: **Таже псалом 50.**

И каноны Осмогласника, Минеи, и Троици. В нихже песнех поем трипеснцы: оставляются таковыя песни Осмогласника, и Минеи: понеже двоирмосны суть трипеснцы.

Канон Троици. Творение господина Иосифа. Глас 8:

Песнь 1:

Ирмос: Воду прошед яко сушу * и Египетскаго зла избежав, * израильтянин вопияше: * Избавителю и Богу нашему поим.

Воздержания божественное время возсия всем, покаяния просвещение, тьму отъемлющее прегрешений: сие усердным сердцем примем.

Се покаяния доброта души расширяет, пощения пригвождением: в сие трезвенно вшедше, и прегрешений вернии разрешение примем.

Слава: Начала, власти, и херувими, и вся силы молитесь, время нам постное совершити в покаянии и всякой чистоте.

Богородичен: Святая Дево, верных заступление едина, молитву Твою споспешную, во время пощения всем подаждь, Богородицу Чистую Тя ведущим.

Ирмос: Воду прошед яко сушу * и Египетскаго зла избежав, * израильтянин вопияше: * Избавителю и Богу нашему поим.

Песнь 3:

Ирмос: Небеснаго круга * верхотворче Господи, * и Церкви Зиждителю, * Ты мене утверди в любви Твоей, * желаний краю, верных утверждение, * едине Человеколюбче.

Всегубительных страстей душевных убежим подъятием поста, и умиления покажем плоды, первее грехами Бога благоутробнаго преогорчившии.

Свещи елеем благих деяний, вси ныне вжещи тщательнo возусердствуим, яко да внидем с мудрыми девами во светлый чертог радующеся.

Богоглаголивии пророцы, боговиднии мученицы, и божественнии ученицы Спасовы, Того молите, добре начати и благоугодно скончати пощения поприще, вси помолимся.

Богородичен: Яко вину Тя всех благих Владычице, вси прилежно молим: еже совнити нам Твоим ходатайством в постный подвиг, и концу дароватися сего спасительному.

Ирмос: Небеснаго круга * верхотворче Господи, * и Церкви Зиждителю, * Ты мене утверди в любви Твоей, * желаний краю, верных утверждение, * едице Человеколюбче.

Таже седален Миней, и Крестобогородичен:

Песнь 4:

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Якоже утро приникши, ныне пощения благодать предлагает покаяния время нам, долгов тьму разрешающее.

Напитаим нищия, милость милостию восприемающе, и пощения божественною водою душевныя скверны отмыем.

Слава: Небеснии ангели Благодавца умолите, умиленное наше покаяние, щедротами безмерными прияти.

Богородичен: Чистое очистилище согрешающих, святая Владычице, ходатайством Твоим раздери согрешений моих рукописание.

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Песнь 5.

Ирмос: Вскую мя отринул еси * от лица Твоего Свете незаходимый, * и покрыла мя есть чуждая тьма окаяннаго? * Но обрати мя, и к свету заповедей Твоих * пути моя направи, молюся.

Настоящий день, начаток творяще жития чистоты, себе усердно к подвигом вернии уготовим, плотския болезни, и душевное благоплодие Владыце всех приносяще.

Моисеа пост, Божественнаго боговидения показа причастника: сего убо душе моя подражающе, пост приими, божественная восхождения в себе расположивши, яко да видиши Божию светлость.

Священных апостол, и священноименитых мученик мольбами, пощения время прейти нас сподоби Иисусе Щедрый, в покаянии, и всяком отложении греха, молимся.

Богородичен: В пощения дверь хотящии внити, молим Тя Божию дверь, совнити рабом Твоим Владычице, и расширити всяко помышления, и мысли, спасительная творити хотения.

Таже трипеснец господина Иосифа. Глас 6:

Песнь 5:

Ирмос: Божиим светом Твоим, Блаже, * утреннюющих Ти души * любовию озари, молюся, * Тя ведети, Слове Божий, * Истиннаго Бога, * от мрака греховнаго взывающа.

На Кресте руже пригвоздив, копием в ребра прободен, писание Человеколюбче падшаго Адама растерзал еси: темже Тя Жизнодавче, песньми славим.

Лестно змий лукавый страсти наложив ми душевныя, от рая изгна: Ты же длани на Кресте пригвоздив, к высоте нетления Спасе привлекл еси.

Поста божественное время, страсти очищающее душевныя, и телесныя омывающее язвы, прииде ныне, наста: вернии стецемся, и сие любомудренно примем.

Время явися благое, в божественное души веселие, всякое лице облачающее: приидите, весело сие примем, постом и молитвою предочищающесея.

Пост, слезы, молитву, обычай смиренный, нас ради смирившемуся принесем: яко да в день воздержания прощение подаст прегрешений наших.

Богородичен: Светолучными Твоими блистаньми, Владычице Благая мира, души моя тьму отжени, и ночь греха моего: да усердно пою, и блажу Тя.

Иный, глас 8:

Ирмос: Вскую мя отринул еси * от лица Твоего Свете незаходимый, * и покрыла мя есть чуждая тьма окаяннаго: * но обрати мя, и к свету заповедей Твоих * пути моя направи, молюся.

Кресту Твоему поклоняюся Господи Человеколюбче, имже мя спасл еси, и пою страсти спасительныя и Божественныя Владыко, имиже страстей моих болезненных избавихся Слове, в жизнь преходя невредную.

Кресту надеющесея, лести противных отвращаемся, в нем водрузившесея, вернии познани быхом Богу, яко агнцы новорожденнии избраннии, и неместное млеко испихом.

Слава, Троицен: Отца, и Слово вси, и Святаго Духа, славим во едином Естестве, познание светлое излагающе: поклоняющесея обоим, и разделяюще Лицы, неслиянно, непреложно служаще.

Богородичен: Упование концем, радость рабом Твоим Ты еси Дево Чистая, чтущия любовию образ Твой, сохраняй Пречистая: и Твоими молитвами всех нас чуждаго свободи, яко премилосерднейшая.

Слава Тебе Боже наш, слава Тебе.

Правый путь Твой Господи, исправи всем рабом Твоим чтущим любовию, поста поприще утверди, и приведеньми на лучшее святаго Твоего Царствия нас сподоби.

Ирмос: Вскую мя отринул еси * от лица Твоего Свете незаходимый, * и покрыла мя есть чуждая тьма окаяннаго: * но обрати мя, и к свету заповедей Твоих * пути моя направи, молюся.

Песнь 6:

Ирмос: Очисти мя Спасе, * многа бо беззакония моя, * и из глубины зол возведи, молюся: * к Тебе бо возопих, и услыши мя, * Боже спасения моего.

Постився Избавитель, настоящее время нам определи душевных скверн очистительное: теплым вернии приступим сердцем, яко да примем прощение.

Мытареву Христе воздыхание прием, и блудницы от души плач приносимый, прими яко Человеколюбец наша мольбы, очищение нам даруя.

Слава: Проповедник и пророк, мученик и апостол Твоих, преподобных и святителей, и всех праведных Твоих Христе умоленьми, очищение прегрешений душам нашим низпосли.

Богородичен: Единая немощное человеческого естества, божественным Твоим Рождеством Чистая утвердившая, поспешница мне явися, к постному входящу божественному поприщу.

Ирмос: Очисти мя Спасе, * многа бо беззакония моя, * и из глубины зол возведи, молюся: * к Тебе бо возопих, и услыши мя, * Боже спасения моего..

Кондак святого. Аще святыи не имать кондака, глаголем мученичен гласа.

Песнь 7:

Ирмос: Отроцы еврейстии в печи попраша * пламень дерзновенно, * и на росу огонь преложиша, вопиюще: * благословен еси * Господи Боже во веки.

Древле на колеснице огненной ношашеся Илия, постом просветився: о душе! сего подражающе, плотския умертви похоти воздержанием.

Се время воздержания, являющее тебе свет спасения, не небрези душе, Богу долготерпящу, но усердно возопий: Благий ущебри мя.

Слава: Отроки оградивший пост, соблюде от огня неопалимы: Иисусе, тех молитвами, огня мя вечнаго избави многим Твоим милосердием.

Богородичен: Единая помощь человек, помощница нам рабом Твоим буди, во время воздержания, яко да покаянием благоугождающе, примем Небесное Царство.

Ирмос: Отроцы еврейстии в печи попраша * пламень дерзновенно, * и на росу огонь преложиша, вопиюще: * благословен еси * Господи Боже во веки.

Песнь 8:

Ирмос: Седмерицею печь * спасены сия виде, Творцу и Избавителю вопияше: * отроцы благословите, * священницы воспойте, * людие превозносите во вся веки.

Покаяния печь усердно возжжем, и сласти в ней попалим вся телесныя: и огня будущаго искус не прияти, Богатаго в милости просим, вопиюще: священницы благословите, людие превозносите во вся веки.

Входное время поста нам будет всякаго греха отложения виновное, да не долу преклонимся, ниже уныло тецем, яко да в кратких и малых днех, многия скверны умилением сердца измыем, единого Бога нашего поюще.

Ангельстии чини, мученик собрание, божественных апостол лик святой, преподобных собор, святителей же и пророков, Тебе молятся Благий Человеколюбче: покаяние истинное Твоим рабом подаждь, во время воздержания ныне вводимого.

Богородичен: Богородительнице Всечистая, к Тебе прибегаем, ущебри нас благою Твоею молитвою, и даждь благопримирительна Твоего Сына и Господа всем нам, во время пощения ныне вводимого, во спасение верных, Тебе песнословящих во вся веки.

Тришеснец:

Ирмос: За законы отеческия ...,

Наследие отеческое не сохранивши, греховным законом поработихомся: но простер длани Твоя на Кресте Божественном, свободу всем даровал еси им: егоже Ти верою приводим во днех святых, помилуй ны Милостиве, Тебе превозносящия во вся веки.

Крестом Твоим разстояние, и градежа средостение разоривый, и мир в концах обновивый богатый мирствующим, даруй нам прейти Христе постояннем будущем пощении, Господа поющим непрестанно, и превозносящим во вся веки.

Поста благодать днесь солнечныя лучи всем предлагает, предочищающа мрак от греха: содержими страстьми различными, в радости прешедше примем дар любомудренно, Господа пойте, вопиюще, и превозносите во вся веки.

Горько объем первозданный, в раи древле снедь безсловесно, отвержесе и осужден, от сладости изгнан бысть: но на Древе гвоздьми пригвожден, лукавное писание пригвоздил еси греха его. Темже Твое многое благоутробие воспеваем во вся веки.

Закон поста отринувше, в пропасти греха поползохомся, и поста востребовахом ныне вводимого: егоже Щедре провождающим нам, благодать с небесе низпосли, и мир богатый: Господа пойте дела, и превозносите во вся веки.

Богородичен: Падающих исправление, грешников ходатаице, странных прохлаждение, скорбных утешение, Пресвятая Дево, души моя печаль разори Чистая, и утешение свыше от Бога подати ми молися поюще усердно, Тя превозносящу во вся веки.

Иный:

Ирмос: Ангели и небеса на престоле славы сидящаго, * и яко Бога непрестанно славимаго, * благословите, пойте, * и превозносите его во веки.

Пригвожденнаго плотию на Кресте Щедре, видящи Тя тварей естество прменяшесе: свет дне во тьму, движашесе земля, и вся колебахуся.

На высоту Креста человеческое естество совозвысив, и от ребр Твоих Божественных богатство источил еси спасения, верою поклоняющимся Спасе пречистой страсти Твоей.

Благословим Отца, и Сына, и Святаго Духа, Господа.

Троицен: Един Бог убо Троица, ни Отцу изступившу в сыновство, ниже Сыну пременившуся во исхождение: но свойственная и обою, Свет, Бога, три славлю во веки.

Богородичен: Како родила еси рцы, от Отца безлетно предпросиявши, и со Святым Духом воспеваема? Или якоже весть един, благоволивый родитися из Тебе во веки.

Слава Тебе Боже наш, слава Тебе.

Покаяние наше, яко благий естеством прием, вражних сетей избави Господи, да верою и любовию Твое ныне воспоим святое владычество.

Хвалим, благословим, покланяемся Господеви:

Ирмос: Ангели и небеса на престоле славы сидящаго, * и яко Бога непрестанно славимаго, * благословите, пойте, * и превозносите его во веки.

И стихословится Честнейшую:

Песнь 9.

Ирмос: Ужасеся о сем небо, * и земли удивипася концы, * яко Бог явися человеком плотски, * и чрево Твое бысть пространнейшее небес: * тем Тя Богородицу * ангелов и человек чиновначалия величают.

Се светносное прииде время, святыи день просия, мрачных страстей твоих отбегни, о душе! и зари восприими наставляющия тя к свету, умиление яко вино пиющи веселися, и сластей пьянство возненавиждь.

Яко воистинну блажайшее время пощения Христе, еже дал еси всем верным на побеждение грехов, и очищение спасительное, и дарований приятелище, в немже Тя молим: причастники Спасе, вся ны благих Твоих сотвори.

Обычно милости Твоя на нас изливай Щедре богатыя, даждь нам слезы, очищающия скверны и помышления любящих Тя: веру и любовь чистую, богатое покаяние, присвоение совершенное к Тебе единому Многомилостивому.

Всех ангелов божественное множество, и святых лица достохвальнии, Благого ныне молити прилежно: яко да божественное поприще сие, пощения настоящее, теши непреткновенно ны укрепит, и победоносцы соделает.

Богородичен: Благолюбивая Дево, благо рождающая Спаса, ублажи вся ны, страстями безмерными, и помышленьми озлобленныя Владычице, и отягченныя грехов бременьми неудобноносными: яко да Тя по долгу, яко Богородицу величаем.

Иный:

Ирмос: Не доумет всяк ...,

Не доумет всякое естество, ангелов и человеков, Твое благоутробие благодарити Благодетелю: яко плотию хотя нас ради обнищал еси, и на Древе о нас распростерлся еси, клятва быв, да первую отымеши клятву человечества.

Светлый день воздержания наста, светлым лицом приидите, усрящим душе моя Владыку, благодати низпослатися свыше нам просяще, и многих

прегрешений исправление обрести: яко да страшнейшего геенною не искусимся тамо.

Во тьме грехов содержимым, покаяния ныне священнии входы насташа, всех души просвещающия. Темже душе моя, омрачения уклонися сытости страстей, потщися, да сладости вечныя насладишися тамо.

На Древе руце волею распростер, разстоящаяся вся собрал еси Жизнодавче: кошим же Твоя отверзл долготерпеливе ребра, побеждение от ребр прозябшее исправил еси нам. Темже благодаряще поем благоутробие Твое.

Богородичен: Предстательство всех на Тя надеющихся, в бедах бодряя суци предстательнице Богородице, вечнующую избави нас геенны, и належащих мук горьких: яко да должно поем величия Твоя.

Иный.

Ирмос: Чужде матерем девство, * и странно девам деторождение: * на Тебе Богородице обоя устроишася. * Тем Тя вся племена земная * непрестанно величаем.

Язвам покланяемся Твоим Жизнодавче, имиже греха страстей избавльшеся, честным Крестом Твоим познахомся запечатствовани, во спасение и заступление от всякаго прилога вражия.

Озари Креста Твоего сияньми, укрествовавыйся волею за всех спасение, души поющих страсти Твоя Всемиловитиве: и на стезю жизнь нашу управи и настави.

Согрешихом преступивше заповеди Твоя, и пути Божественных зачинений Твоих Спасе, уклонихомся далече Человеколюбче, нерадением: но Щедрый, воззови от лести души наша.

Слава, Троицен: Хвала, честь Троице лепотствует, и слава яко единому Господьству, и единому Царству, неслитно, несечно, Единице Божеством покланяемой, несечной бо Естеством, непрестанно величаемей.

Богородичен: Умилостивися молитвами Всечистыя Матере Твояе Всецедре Всецарю славы, егда приидеши судити рабы Твоя, яко милостив: в Тя бо вси веровахом, и Тя Бога знаем.

Слава Тебе Боже наш, слава Тебе.

Светоносный ныне надходящий пост, приемлет трапезу подвигов предложенную, сего ради сея трезвенно вси, честную чашу очистительных слез воспримем вернии: да неисцельными слезами не искусимся тамо.

Катавасия: Чужде матерем девство, * и странно девам деторождение: * на Тебе Богородице обоя устроишася. * Тем Тя вся племена земная * непрестанно величаем.

Светилен Троичный гласа, трижды. И прочее.

На стиховне поем самогласен дне.

Глас 6: Прежде спасительнаго Креста греху царствующу, * нечестию державствующу, * человек ублажашеся пища телесная, * и о плотских желаниях мали небрежаху: * а отнележе Крестное таинство содеяся, * и демонское угасе мучительство богоразумием, * небесная на земли добродетель жительствует. * Темже пост почитается, * воздержание сияет, * молитва исправляется, * и

свидетель время настоящее, * данное нам от распяшагося Христа Бога, * во спасение душ наших.

И глаголем стихи.

Стих 1: Исполнихомся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. * И призри на рабы Твоя, и на дела Твоя, и настави сыны их.

Прежде спасительнаго Креста греху царствующу, * нечестию державствующу, * человеков ублажашеся пища телесная, * и о плотских желаниях мали небрежаху: * а отнележе Крестное таинство содеяся, * и демонское угасе мучительство богоразумием, * небесная на земли добродетель жительствует. * Темже пост почитается, * воздержание сияет, * молитва исправляется, * и свидетель время настоящее, * данное нам от распяшагося Христа Бога, * во спасение душ наших.

Стих 2: И буди светлость Господа Бога нашего на нас, и дела рук наших исправи на нас, * и дело рук наших исправи.

Господи, в память святых Твоих, * вся тварь празднует, небеса радуются со ангелы, * и земля веселится с человеки: * тех молитвами помилуй нас.

Слава, и ныне, Крестобогородичен:

Всечистая яко виде Тебе на Кресте повешена, * плачуци вопияше матерски: * Сыне Мой и Боже Мой, * сладчайшее Мое Чадо, * како терпиши страсть поносную?

Таже: Благо есть исповедатися Господеви, и пети имени Твоему, Вышнии, возвещати завтра милость Твою, и истину Твою на всяку ночь.

Трисвятое. И Отче наш:

И тропарь:

В церкви стояще славы Твоя, на Небеси стояти мнимся, Богородице дверь Небесная, отверзи нам двери милости Твоя.

Господи помилуй, 40.

Слава, и ныне: Честнейшую херувим:

Именем Господним благослови отче.

Иерей: Сый благословен Христос Бог наш, всегда ныне и присно, и во веки веков, аминь.

И молитву: Небесный Царю, * веру утверди, * языки укроти, * мир умири, * святой храм сей добре сохрани, * прежде отшедшия отцы и братию нашу * в селениих праведных учини, * и нас в покаянии и исповедании приими, * яко Благий и Человеколюбец.

И творим три поклоны великия,

и глаголем молитву преподонаго ефрема сирина:

Господи и владыко живота моего, дух праздности уныния, любоначалаия, и празднословия не даждь ми.

Дух же целомудрия, смиренномудрия, терпения, и любве, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

Малые Поклоны: 12.

Паки скончавше поклоны, глаголем молитву вышеписанную Господи и Владыко живота моего: и поклон един великий.

Совокупаем же и первый час, яко обычно: по обычных же поклонех чтем оглашения преподобнаго отца нашего Феодора Студита. Таже отпуст.

В тойже пяток сырный, поем часы с поклоны, якоже и в среду явлено есть.

НА 6-М ЧАСЕ

Поём тропарь пророчества, глас 8:

Даждь нам помощь от печали Господи, * и спаси ны, * рождейся от Девы * Человеколюбче. Повторяюще тойже.

Прокимен глас 1:

Прокимен: Буди Господи милость Твоя на нас, якоже уповахом на Тя.

Стих: Радуйтеся праведнии о Господе, правым подобает похвала.

Пророчества Захариина чтение. [Глава 8, ст. 7 – 17.]

Сице глаголет Господь Вседержитель: се Аз спасу люди Моя от земли восточныя, и от земли западныя. И введу их [в землю их,] и вселюся посреде Иерусалима, и будут Ми в люди, и Аз буду им в Бога во истине и в правде. Сице глаголет Господь Вседержитель: да укрепятся руце вас слышащих во днех сих словеса сия от уст пророческих, от негоже дне основася храм Господа Вседержителя, и церковь отнележе создася. Зане прежде дней оных мзда человеком не бе во успех, и мзда скотом не бяше, и исходящему и входящему не бе мира от печали, и пошлю вся человеки, коегождо на искренняго своего. И ныне не по днем онем прежним Аз сотворю останку людей сих, глаголет Господь Вседержитель. Но покажу мир: виноград даст плод свой, и земля даст жита своя, и небо даст росу свою, и наследити сотворю останкам людей Моих сих вся сия. И будет, яко бесте в клятве во языцех, доме Иудов и доме Израилев, тако спасу вы, и будете в благословении: дерзайте и укрепляйтесь руками вашими. Зане сице глаголет Господь Вседержитель: якоже помыслих озлобити вы, внегда прогневаша Мя отцы ваши, глаголет Господь Вседержитель, и не раскаяхся: Тако уставих, и умыслих во дни сия добро сотворити Иерусалиму, и дому Иудову: дерзайте. Сия словеса, яже сотворите, глаголите истину кийждо искреннему своему, истину и суд мирен судите во вратех ваших. И кийждо злобы искренняго своего не помышляйте в сердцах ваших, и клятвы лживыя не любите: зане вся сия возненавидех, глаголет Господь Вседержитель.

Прокимен, глас 3:

Прокимен: Пойте Богу нашему, пойте, пойте Цареву нашему, пойте.

Стих: Все языцы восплещете руками:

И прочее все, якоже в среду сырную указася.

Подобает ведати, яко в субботу и Неделю сырную Минея не поется, но последование случающихся святых поется, на Повечериях, или егда церквоначальник хошет.